

sic ait intentaque adiutum missile planta 540
 derigit, et lapsis patuerunt vulnera villis.
 nec minus Aeolii proles Aeetia Phrixi
 fertur et ipsa furens ac se modo laeta Cytacis
 agminibus, modo cognatis ostentat Achivis.
 atque hos in medio duri discrimine belli 545
 laudibus inque ipsis gaudens ubi vidit Iason
 'macte' ait 'o nostrum genus et iam certa propago
 Aeoliae nec opina domus; sat magna laborum
 dona fero, satis hoc visu quaecumque rependo.'
 dixit et in Sueten magnique in fata Ceramni 550
 emicuit clipeumque rotans hunc poplite caeso
 deicit, illum aperit lato per pectus hiatu.
 Argus utrumque ab equis ingenti porrigit arvo
 et Zacorum et Phalcen, peditem pedes haurit Amastrin.
 sanguinis ille globos effusaque viscera gestat 555
 barbarus et cassa stridens sublabitur ira.
 dat Calais Barisanta neci semperque propinquas
 Riphea venali comitantem sanguine pugnas.
 centum lecta boum bellator corpora, centum
 pactus equos (his ille animam lucemque rependit), 560
 crudelis; tandem dulces iam cassus in auras
 respicit ac nulla caelum reparabile gaza.
 labitur intortos per tempora caerula crines
 tum quoque materna velatus harundine Peucon.
 at genetrix imis pariter Maeotis ab antris 565
 implevit plangore lacus natumque vocavit
 iam non per ripas, iam non per curva volantem
 stagna nec in medio truncantem marmore cervos.
 Eurytus Exomatas agit aequore. Nestoris hastae
 immoritur primaevus Helix, nec reddita caro 570
 nutrimenta patri, brevibus<que> ereptus in annis.
 at Latagum Zetemque Daraps, illum exigit hasta,